

Il giug da ballapei da « Buena Vista »

Yarledi Salazar Guilombo, la mattatscha dad 8 onns viva en Columbia. Ella ei plein d'energia. Buca da smarvegliar. Mintgadi sto ella descender la via teissa dil pign bein puril da lur famiglia tochen giu en scola e puspei anavos. Quei ei in viadi a pei da varga in'ura cun ina differenza d'altezia da 400 meters. „Buena Vista“ senumna il pign bein puril da lur famiglia. Els possedan pors, gaglinas, 2 tgauns e schizun in papagagl. Mo lur veta ei dira. La proxima via ei duas uras naven da lur bein. Els han buc electricitad ed era buc aua currenta.



La mumma cloma Yarledi allas tschun e mesa La famiglia ura comunablamein l'oraziun dalla damaun. Aunc avon ensolver gida Yarledi plein curascha siu padrafter da mulscher las vaccas. Per saver far quella lavur, ligia ella ensemen las combas davos dalla vacca. Quei ei prigus. Ella sto dar adatg che la vacca tili buca davos ora. Yarledi va bugen a scola. Ella ei la megliera scolara dalla tiarza classa.

Ella siemia da vegnir scolasta. Duront la pausa dat ella ballapei cun ils conscolars. Mo, il curom ei sedistacaus dalla balla ed aschia vegn quella tenuta ensemen d'entginas cordas. Quei sminuescha buc il tschaffen da dar ballapei. Il pli bugen ei Yarledi el gol. „Inaga hai jeu tenu la balla cun maun stendiu. Il pass suandont hai jeu saviu sittar anavos cul pei“, raqueta ella sco sche quei fuss schabegiau per da cuort. Yarledi trenass e giugass bugen en ina squadra. Mo ella habitescha memia lunsch naven dil vitg.

Yarledi dat era ballapei a casa. Ils daners per cumprar ina balla mauncan. Perquei ha ella sviluppau in'atgna fuorma da balla. Quella numna ella pingpong. Plein temperament dribl'ella cun ina rucla d'in deodorant per la casa entuorn ed ora sin veranda e denter las gaglinas ora sil plaz avon casa. Quei ei il giug da ballapei da „Buena Vista“ !

